

## SEKSYEN 3

# Perbelanjaan Kerajaan Persekutuan

**39 PERSPEKTIF KESELURUHAN**

---

**39 PRESTASI 2021**

---

**43 KUMPULAN WANG  
COVID-19**

Sisipan - Status Terkini Kumpulan Wang  
COVID-19

---

**48 TINJAUAN 2022**

---

**50 PINJAMAN BOLEH DITUNTUT  
PERSEKUTUAN**

---

**51 KESIMPULAN**

---



## SEKSYEN 3

# Perbelanjaan Kerajaan Persekutuan

## Perspektif Keseluruhan

Peningkatan semula kes COVID-19 telah memaksa Kerajaan melaksanakan semula perintah kawalan pergerakan (PKP) yang memberi impak kepada hampir semua sektor ekonomi dan mengehendkan aktiviti sosial. Beberapa pakej bantuan dan rangsangan ekonomi telah diperkenalkan bagi menyediakan bantuan segera kepada rakyat dan perniagaan. Pakej tersebut mengambil pendekatan yang bersasar dalam memastikan langkah yang diperkenalkan berupaya mengurangkan impak pandemik dengan berkesan.

Sokongan fiskal tambahan bertujuan terutamanya untuk mengukuhkan sistem kesihatan awam dan menyediakan bantuan tunai kepada isi rumah dan perniagaan. Sokongan ini telah meningkatkan perbelanjaan khususnya bagi komitmen di bawah Kumpulan Wang COVID-19 (KWC-19). Pertambahan perbelanjaan tersebut diimbangi oleh langkah penyusunan semula perbelanjaan yang teliti. Kerajaan juga terus menguruskan sumber fiskal dengan meningkatkan kecekapan perbelanjaan, mengurangkan ketirisan dan mengoptimalkan perbelanjaan mengurus dalam norma baharu. Inisiatif ini dilaksanakan dengan pemantauan rapi dan pelaporan secara mingguan selaras dengan prinsip akauntabiliti dan ketelusan.

Secara umum, peningkatan komitmen perbelanjaan dalam tempoh pandemik adalah disebabkan oleh keutamaan Kerajaan untuk menyediakan sokongan yang sewajarnya kepada ekonomi. Pelaksanaan Pelan Pemulihan Nasional (PPN) dan kelancaran pelaksanaan program vaksinasi akan memudahkan pembukaan semula perniagaan seterusnya membantu ekonomi kembali kepada trajektori

potensi pertumbuhan. Pelaksanaan Rancangan Malaysia Kedua Belas, 2021 – 2025 (RMKe-12) akan turut memangkin proses pemulihan dan memacu negara ke arah mencapai kemakmuran, inklusiviti dan kemampuan dalam jangka masa sederhana. Pada masa yang sama, prinsip akauntabiliti dan tadbir urus yang baik akan terus ditingkatkan seiring dengan amalan terbaik global seperti yang dinyatakan dalam Kenyataan Pra-Bajet yang pertama dan Kertas Konsultasi Awam bagi penyediaan Bajet 2022. Di samping itu, Kerajaan akan melaksanakan semakan perbelanjaan secara berkala untuk memastikan perbelanjaan yang cekap dan berkesan seterusnya menyokong konsolidasi fiskal dalam jangka masa sederhana.

## Prestasi 2021

Perbelanjaan Kerajaan Persekutuan pada 2021 dianggarkan berjumlah RM322.5 bilion. Pada tahun ini, sebanyak empat pakej bantuan dan rangsangan ekonomi telah diumumkan iaitu Perlindungan Ekonomi dan Rakyat Malaysia (PERMAI), Program Strategik Memperkasa Rakyat dan Ekonomi (PEMERKASA), Program Strategik Memperkasa Rakyat dan Ekonomi Tambahan (PEMERKASA+) dan Pakej Perlindungan Rakyat dan Pemulihan Ekonomi (PEMULIH) berjumlah RM225 bilion dengan suntikan fiskal sebanyak RM25 bilion. Secara umum, pakej tersebut adalah dalam bentuk bantuan tunai kepada rakyat dan perniagaan terutamanya bagi yang terkesan akibat PKP yang berpanjangan berikutan pandemik. Selain itu, langkah rangsangan tambahan dan pembendungan pandemik telah memberi tekanan kepada unjuran hasil yang lebih rendah berbanding anggaran Belanjawan. Situasi ini memerlukan penyusunan semula

perbelanjaan terutamanya perbelanjaan mengurus yang harus dibiayai sepenuhnya daripada hasil selaras dengan peruntukan di bawah Perlembagaan Persekutuan. Oleh itu, jumlah perbelanjaan Kerajaan Persekutuan 2021 telah disemak semula lebih rendah kepada RM320.6 bilion. Walau bagaimanapun, jumlah berkenaan lebih tinggi berbanding jumlah perbelanjaan pada tahun sebelumnya (2020: RM314 bilion).

Penyusunan semula ini melibatkan pengurangan bersih dalam perbelanjaan sebanyak RM1.9 bilion yang dijana melalui penjimatan perbelanjaan berjumlah RM23.9 bilion. Penjimatan ini disalurkan semula untuk membiayai tambahan suntikan langsung fiskal yang dianggarkan sebanyak RM22 bilion di bawah KWC-19. Penjimatan perbelanjaan berkenaan dijana daripada penjadualan semula program dan projek tertentu, penangguhan program tidak kritikal, semakan semula peruntukan langkah belanjawan serta jangkaan pengurangan perbelanjaan disebabkan oleh penundaan projek semasa tempoh PKP.

Berdasarkan jumlah peruntukan yang disemak semula, perbelanjaan mengurus (OE) dianggarkan berjumlah RM219.6 bilion (14.5% kepada KDNK), perbelanjaan pembangunan (DE) berjumlah RM62 bilion (4.1% kepada KDNK) manakala baki RM39 bilion (2.6% kepada KDNK) adalah untuk KWC-19. Sektor sosial kekal sebagai penerima terbesar dengan jumlah peruntukan sebanyak RM128.5 bilion (40.1% daripada jumlah keseluruhan) diikuti oleh sektor ekonomi (RM66.9 bilion; 20.9%), keselamatan (RM31.5 bilion; 9.8%) dan pentadbiran am (RM16.7 bilion; 5.2%). Perbelanjaan tanggungan dan bayaran pindahan antara lain terdiri daripada bayaran khidmat hutang, bayaran persaraan dan pindahan kepada kerajaan negeri merangkumi 24% daripada perbelanjaan keseluruhan.

Peruntukan **OE** 2021 disemak lebih rendah sebanyak 7.1% kepada RM219.6 bilion berbanding peruntukan asal sebanyak RM236.5 bilion. Semakan yang lebih rendah

ini terutamanya disebabkan oleh penjimatan geran dan pindahan serta bekalan dan perkhidmatan. Peruntukan geran dan pindahan yang lebih rendah disebabkan oleh potongan geran kepada badan berkanun yang mempunyai rizab tinggi. Begitu juga dengan unjuran bekalan dan perkhidmatan lebih rendah berikutan pengelasan semula item berkaitan pembangunan kepada DE dan penjimatan daripada penangguhan peruntukan item yang tidak kritikal.

Peruntukan OE disemak semula kepada RM219.6 bilion iaitu lebih rendah sebanyak 2.2% berbanding RM224.6 bilion pada 2020. Peruntukan yang lebih rendah terutamanya disebabkan oleh pengurangan peruntukan bekalan dan perkhidmatan kepada RM23.3 bilion (2020: RM29.3 bilion) khususnya untuk pembaikan dan penyelenggaraan, perkhidmatan profesional serta bekalan pejabat. Selain itu, perbelanjaan untuk subsidi dan bantuan sosial berkurang kepada RM16.7 bilion (2020: RM19.8 bilion) terutamanya disebabkan oleh program bantuan tunai yang dibiayai melalui KWC-19. Walau bagaimanapun, pengurangan tersebut dijangka diimbangi oleh perbelanjaan subsidi bahan api yang lebih tinggi. Tambahan pula, emolumen dianggarkan meningkat kepada RM84.5 bilion (2020: RM83 bilion) manakala bayaran persaraan sebanyak RM27.6 bilion (2020: RM27.5 bilion) terutamanya disebabkan oleh kenaikan gaji dan pencen tahunan. Bayaran khidmat hutang juga dianggarkan meningkat sebanyak 13.1% kepada RM39 bilion (2020: RM34.5 bilion) berikutan keperluan pembiayaan yang lebih tinggi untuk perbelanjaan berkaitan DE dan COVID-19 manakala geran dan pindahan kepada kerajaan negeri dan badan berkanun dianggarkan meningkat sebanyak 16.6% kepada RM20.9 bilion (2020: RM18 bilion).

Tahun 2021 merupakan tahun pertama RMKe-12. Sejumlah RM400 bilion diperuntukkan untuk **DE** di bawah RMKe-12 iaitu peningkatan ketara sebanyak 61% berbanding perbelanjaan sebenar Rancangan Malaysia Kesebelas sebanyak RM248.5 bilion. Peruntukan tersebut

**JADUAL 3.1.** *Perbelanjaan Mengurus Kerajaan Persekutuan Mengikut Komponen 2020 – 2022*

KOMPONEN	RM JUTA			PERUBAHAN (%)			BAHAGIAN (%)		
	2020	2021 <sup>1</sup>	2022 <sup>2</sup>	2020	2021 <sup>1</sup>	2022 <sup>2</sup>	2020	2021 <sup>1</sup>	2022 <sup>2</sup>
Emolumen	82,996	84,529	86,510	3.1	1.8	2.3	36.9	38.5	37.0
Bayaran persaraan	27,533	27,581	28,067	6.3	0.2	1.8	12.3	12.6	12.0
Bayaran khidmat hutang	34,495	39,000	43,100	4.7	13.1	10.5	15.4	17.8	18.5
Pemberian dan serahan kepada kerajaan negeri	7,669	7,745	7,927	1.3	1.0	2.3	3.4	3.5	3.4
Perkhidmatan dan bekalan	29,323	23,265	30,367	-6.9	-20.7	30.5	13.0	10.6	13.0
Subsidi dan bantuan sosial	19,769	16,701	17,352	-17.3	-15.5	3.9	8.8	7.6	7.4
Pembelian aset	631	415	533	-18.1	-34.2	28.4	0.3	0.2	0.2
Bayaran balik dan hapus kira	654	511	375	-26.8	-21.9	-26.6	0.3	0.2	0.2
Pemberian kepada badan berkanun	10,291	13,190	14,066	-25.3	28.2	6.6	4.6	6.0	6.0
Lain-lain	11,239	6,663	5,203	-75.3	-40.7	-21.9	5.0	3.0	2.3
<b>Jumlah</b>	<b>224,600</b>	<b>219,600</b>	<b>233,500</b>	<b>-14.7</b>	<b>-2.2</b>	<b>6.3</b>	<b>100.0</b>	<b>100.0</b>	<b>100.0</b>
<b>Bahagian kepada KDNK (%)</b>	<b>15.9</b>	<b>14.5</b>	<b>14.3</b>						

<sup>1</sup> Anggaran disemak

<sup>2</sup> Anggaran belanjawan tidak termasuk langkah Bajet 2022

Sumber: Kementerian Kewangan Malaysia

akan disalurkan untuk membiayai projek serta program baharu dan sedia ada yang dirancang di bawah sektor ekonomi, sosial, keselamatan dan pentadbiran am. Projek dan program ini diselaraskan dengan tiga tema utama RMKe-12 iaitu menjana semula ekonomi; memperkukuh keselamatan, kesejahteraan dan inklusiviti; dan melonjakkan kemampanan. Tema tersebut seiring dengan aspirasi jangka masa panjang negara dalam Wawasan Kemakmuran Bersama 2030 dan Agenda Pembangunan Mampan 2030.

Namun begitu, peruntukan DE disemak lebih rendah kepada RM62 bilion berbanding anggaran asal RM69 bilion berikutan penyusunan semula perbelanjaan. Semakan lebih rendah ini juga sejajar dengan penilaian semula dan penangguhan beberapa projek. Walau bagaimanapun, DE yang lebih rendah diimbangi oleh pengelasan semula beberapa item berkaitan pembangunan daripada OE. Sejumlah RM60.8 bilion adalah peruntukan langsung sementara baki RM1.2 bilion merupakan pinjaman kepada kerajaan negeri dan entiti berkaitan Kerajaan.

Oleh kerana Kerajaan terus memberi tumpuan kepada sektor ekonomi, peruntukan sektor ini kekal sebagai penerima terbesar merangkumi 54.5%, diikuti oleh sektor sosial (28%), keselamatan (11.8%) dan pentadbiran am (5.7%). Perbelanjaan untuk sektor ekonomi dianggarkan berjumlah RM33.8 bilion terutamanya untuk meningkatkan infrastruktur pengangkutan awam dan jaringan komunikasi, membangunkan utiliti awam, merancang aktiviti perdagangan dan perindustrian serta memacu pertanian. Subsektor pengangkutan diperuntukkan sebanyak RM13 bilion dengan sebahagian besarnya untuk membiayai projek utama yang sedang berjalan seperti projek Laluan Berkembar Elektrik Gemas-Johor Bahru dan Lebuh raya Pan Borneo serta menambah baik jalan persekutuan di seluruh negara. Subsektor tenaga dan kemudahan awam diperuntukkan sebanyak RM3 bilion manakala perdagangan dan industri sebanyak RM2.4 bilion. Beberapa projek dan program utama di bawah subsektor ini termasuk kerja menaik taraf dan pembinaan loji rawatan kumbahan, menyediakan dan menambah baik bekalan elektrik dan air, meningkatkan kemahiran

keusahawanan untuk perusahaan mikro, kecil dan sederhana (PMKS) serta mendorong dan meningkatkan penggunaan teknologi dalam kalangan perniagaan. Subsektor pengangkutan, tenaga dan kemudahan awam serta perdagangan dan industri merangkumi 29.6% daripada jumlah DE.

Perbelanjaan untuk sektor sosial pada 2021 dijangka meningkat sebanyak 25.5% kepada RM17.3 bilion (2020: RM13.8 bilion) dengan pendidikan dan latihan, serta kesihatan kekal sebagai subsektor utama. Subsektor pendidikan dan latihan memperoleh peruntukan terbesar sebanyak RM8.1 bilion iaitu 20.5% lebih tinggi berbanding RM6.7 bilion pada 2020 terutamanya untuk peningkatan program

pendidikan dan latihan teknikal dan vokasional (TVET); penambahbaikan dan pengubahsuaian sekolah, kuarters guru dan institusi pengajian tinggi; dan pembinaan tambahan hospital pengajar. Sejumlah RM4.4 bilion atau 7.1% DE diperuntukkan untuk subsektor kesihatan bagi meningkatkan ketersediaan dan kemudahan penjagaan subsidi kesihatan terutamanya di kawasan luar bandar dan pinggir bandar. Selain itu, perbelanjaan tersebut turut meliputi penambahbaikan dan penyelenggaraan hospital dan klinik serta pembelian kenderaan dan peralatan. Antara projek pembinaan di bawah subsektor ini termasuk hospital di Tanjung Karang, Selangor dan Pendang, Kedah serta menaik taraf Hospital Seberang Jaya di Pulau Pinang. Sementara itu, subsektor

**JADUAL 3.2.** Perbelanjaan Pembangunan Kerajaan Persekutuan Mengikut Sektor 2020 - 2022

SEKTOR	RM JUTA			PERUBAHAN (%)			BAHAGIAN (%)		
	2020	2021 <sup>1</sup>	2022 <sup>2</sup>	2020	2021 <sup>1</sup>	2022 <sup>2</sup>	2020	2021 <sup>1</sup>	2022 <sup>2</sup>
<b>Ekonomi</b>	<b>28,712</b>	<b>33,767</b>	<b>40,205</b>	<b>-8.3</b>	<b>17.6</b>	<b>19.1</b>	<b>55.9</b>	<b>54.5</b>	<b>53.2</b>
<i>antaranya:</i>									
Pengangkutan	12,779	13,014	15,509	-7.1	1.8	19.2	24.9	21.0	20.5
Perdagangan dan perindustrian	2,576	2,365	2,087	-15.7	-8.2	-11.8	5.0	3.8	2.8
Tenaga dan kemudahan awam	2,315	2,976	3,167	-16.1	28.6	6.4	4.5	4.8	4.2
Pertanian	2,003	2,815	2,860	-13.4	40.5	1.6	3.9	4.5	3.8
Alam sekitar	1,324	1,537	2,059	-23.2	16.1	34.0	2.6	2.5	2.7
<b>Sosial</b>	<b>13,827</b>	<b>17,347</b>	<b>22,671</b>	<b>-4.5</b>	<b>25.5</b>	<b>30.7</b>	<b>27.0</b>	<b>28.0</b>	<b>30.0</b>
<i>antaranya:</i>									
Pendidikan dan latihan	6,737	8,118	11,955	-11.7	20.5	47.3	13.1	13.1	15.8
Kesihatan	3,983	4,397	4,457	118.0	10.4	1.4	7.8	7.1	5.9
Perumahan	1,015	1,582	1,771	-52.3	55.9	11.9	2.0	2.6	2.3
<b>Keselamatan</b>	<b>5,785</b>	<b>7,317</b>	<b>8,970</b>	<b>3.0</b>	<b>26.5</b>	<b>22.6</b>	<b>11.2</b>	<b>11.8</b>	<b>11.9</b>
<b>Pentadbiran am</b>	<b>3,036</b>	<b>3,569</b>	<b>3,754</b>	<b>9.4</b>	<b>17.6</b>	<b>5.2</b>	<b>5.9</b>	<b>5.7</b>	<b>4.9</b>
<b>Jumlah</b>	<b>51,360</b>	<b>62,000</b>	<b>75,600</b>	<b>-5.2</b>	<b>20.7</b>	<b>21.9</b>	<b>100.0</b>	<b>100.0</b>	<b>100.0</b>
<b>Bahagian kepada KDNK (%)</b>	<b>3.6</b>	<b>4.1</b>	<b>4.6</b>						

<sup>1</sup> Anggaran disemak

<sup>2</sup> Anggaran belanjawan tidak termasuk langkah Bajet 2022

Sumber: Kementerian Kewangan Malaysia

perumahan menerima RM1.6 bilion pada tahun ini meningkat sebanyak 55.9% daripada perbelanjaan sebenar RM1 bilion pada 2020. Perbelanjaan untuk subsektor ini tertumpu kepada Program Perumahan Rakyat (PPR) serta menaik taraf dan menyelenggara kuarters penjawat awam.

Sejumlah RM7.3 bilion atau peningkatan sebanyak 26.5% daripada tahun sebelumnya telah diperuntukkan untuk sektor keselamatan (2020: RM5.8 bilion). Sebahagian besar peruntukan adalah untuk projek dan program yang bertujuan untuk memperkukuhkan pertahanan dan keselamatan dalam negara. Projek dan program ini termasuk menaik taraf peralatan ketenteraan dan keselamatan serta menyelenggara dan menaik taraf sistem rangkaian keselamatan bersepadu. Peruntukan untuk sektor pentadbiran am juga meningkat sebanyak 17.6% kepada RM3.6 bilion (2020: RM3 bilion). Perbelanjaan untuk sektor ini sebahagian besarnya disalurkan untuk meningkatkan penyampaian dan produktiviti dengan memberi fokus kepada pemerkasaan pendigitalan dalam sektor awam. Selain itu, peruntukan ini juga adalah untuk menambah baik dan menyelenggara bangunan, infrastruktur dan fasiliti kerajaan.

## Kumpulan Wang COVID-19

Inisiatif Kerajaan dalam memerangi pandemik terus dibiayai menerusi KWC-19. Pelaksanaan beberapa pakej bantuan dan rangsangan ekonomi telah meningkatkan peruntukan

KWC-19. Siling KWC-19 yang pada awalnya dihadkan kepada RM45 bilion pada 2020 telah ditingkatkan kepada RM110 bilion untuk menampung tambahan perbelanjaan di bawah pakej bantuan dan rangsangan ekonomi baharu.

Selaras dengan peningkatan siling perbelanjaan, peruntukan KWC-19 pada 2021 telah disemak lebih tinggi kepada RM39 bilion daripada anggaran awal RM17 bilion iaitu 2.6% lebih tinggi berbanding perbelanjaan sebenar pada 2020. Peningkatan ini terutamanya bagi menampung keperluan yang lebih besar untuk program seperti Bantuan Prihatin Rakyat (RM16.8 bilion); Program Subsidi Upah (PSU) 2.0 (RM9.7 bilion); Geran PRIHATIN PKS (RM3.4 bilion); perbelanjaan berkaitan COVID-19 (RM2.9 bilion); sokongan bantuan sosial kepada kumpulan mudah terjejas (RM2 bilion); dan projek berskala kecil (RM1.3 bilion) merangkumi 92.7% daripada jumlah peruntukan KWC-19 2021.

Sejumlah RM23 bilion (1.4% kepada KDNK) akan diperuntukkan untuk KWC-19 pada 2022. Sebahagian besar peruntukan yang disediakan adalah untuk program yang dibawa ke hadapan daripada 2021 iaitu bantuan tunai, sokongan bantuan sosial untuk golongan mudah terjejas dan PSU. Peruntukan KWC-19 akan berakhir pada 2022 berikutan tabung ini merupakan kumpulan wang sementara dengan jangka masa selama tiga tahun. Oleh itu, jumlah keperluan KWC-19 dianggarkan mencecah sekitar RM100 bilion di bawah had siling RM110 bilion yang diluluskan. Baki selebihnya akan digunakan sebagai ruang kontigensi sekiranya diperlukan.

**JADUAL 3.3.** Peruntukan Kumpulan Wang COVID-19

PROGRAM	RM JUTA	
	2021 <sup>1</sup>	2022 <sup>2</sup>
Program subsidi upah, insentif pengekalan pekerjaan dan pengambilan pekerja dan bantuan latihan	9,670	3,000
Bantuan Prihatin Nasional	16,801	8,000
Projek berskala kecil	1,311	2,000
Program kemahiran dan peningkatan kemahiran	360	1,000
Pembiayaan PKS PENJANA	-	2,000
Geran PRIHATIN PKS	3,435	-
Pinjaman mikro kredit di bawah Bank Simpanan Nasional dan TEKUN Nasional	520	1,000
Peruntukan bagi perbelanjaan berkaitan COVID-19	2,940	2,000
Dana jaminan makanan	313	-
Elaun khas COVID-19 bagi barisan hadapan	-	-
Dana PENJANA Nasional	290	-
ePenjana	151	-
Diskaun bil elektrik	502	-
Tambahan RM100 bagi Bantuan Sara Hidup (BSH)	-	-
Bantuan khas untuk pelajar institusi pengajian tinggi	-	-
Pembiayaan Mudah Bumiputera	200	-
Subsidi pengangkutan awam MY30	200	-
Bantuan khas untuk pemandu teksi, pemandu bas sekolah, pemandu bas pelancong, pemandu pelancong, pengayuh beca dan pemandu <i>e-hailing</i>	123	-
Sokongan bantuan sosial untuk golongan mudah terjejas	1,980	3,540
Geran automasi pintar	90	460
Pinjaman mudah di bawah MyCreative Venture	-	-
Perlindungan sosial dan latihan bagi pekerja ekonomi <i>gig</i>	-	-
Kempen e-Dagang bagi PKS dan perusahaan mikro	10	-
"Shop Malaysia Online" bagi perbelanjaan dalam talian	40	-
Sokongan penjagaan kesihatan PEKA B40	-	-
Geran bagi pusat jagaan kanak-kanak dan tadika	29	-
Dana kandungan digital	-	-
Bantuan untuk pertubuhan bukan kerajaan	10	-
Pendigitalan penyampaian perkhidmatan kerajaan	15	-
Dana pemasaran dan promosi pendigitalan di bawah Agensi Pembangunan Ekonomi Kebudayaan (CENDANA)	10	-
Pusat Sehati PKS MyAssist	-	-
<b>JUMLAH</b>	<b>39,000</b>	<b>23,000</b>

<sup>1</sup> Anggaran disemak<sup>2</sup> Anggaran belanjawan tidak termasuk langkah Bajet 2022

Sumber: Kementerian Kewangan Malaysia



## SISIPAN

## Status Terkini Kumpulan Wang COVID-19

### Pengenalan

Kumpulan Wang COVID-19<sup>1</sup> telah ditubuhkan pada September 2020 bagi membiayai pakej rangsangan dan pelan pemulihan ekonomi untuk menangani krisis COVID-19. Penubuhan kumpulan wang amanah khusus ini sejajar dengan amalan terbaik antarabangsa, disokong oleh kerangka undang-undang yang kukuh, pengaturan kawalan yang mantap serta standard ketelusan dan pelaporan yang baik. Sejumlah RM38 bilion telah dibelanjakan pada 2020 untuk membiayai program yang disenaraikan dalam Jadual Akta 830. Perbelanjaan ini direkodkan dalam Penyata Kewangan Kerajaan Persekutuan, diaudit oleh Jabatan Audit Negara Malaysia dan dibentangkan di Parlimen.

### Status Kemajuan Semasa

Pada Disember 2020, Parlimen telah meluluskan pindaan Akta 830 untuk meningkatkan siling Kumpulan Wang COVID-19 daripada RM45 bilion kepada RM65 bilion untuk membiayai langkah tambahan rangsangan ekonomi. Tambahan sebanyak RM20 bilion tersebut diperuntukkan bagi Bantuan Prihatin Rakyat (BPR), Program Subsidi Upah (PSU), Geran PRIHATIN PKS (GKP) dan perbelanjaan lain berkaitan COVID-19. Pandemik COVID-19 terus memberi kesan kepada rakyat dan perniagaan pada 2021. Sehubungan itu, Kerajaan telah mengumumkan empat pakej bantuan tambahan iaitu PERMAI, PEMERKASA, PEMERKASA+ dan PEMULIH berjumlah RM225 bilion dengan suntikan fiskal bernilai RM25 billion. Setelah beberapa penyusunan semula peruntukan dalam Kumpulan Wang COVID-19, keperluan Kumpulan Wang tersebut dianggarkan melebihi siling RM65 bilion. Dalam hal ini, Kerajaan telah membentangkan pindaan kedua Akta 830 di Parlimen untuk meningkatkan siling perbelanjaan sehingga RM110 bilion dengan mengambil kira keperluan Bajet 2022. Program yang memerlukan peruntukan tambahan adalah BPR, PSU, GKP, projek berskala kecil, pinjaman mikro kredit di bawah Bank Simpanan Nasional dan TEKUN Nasional, perbelanjaan lain berkaitan COVID-19 dan sokongan bantuan sosial untuk golongan mudah terjejas.

### Prestasi Perbelanjaan

Sehingga akhir Ogos 2021, sebanyak RM58.9 bilion telah dibelanjakan di bawah Kumpulan Wang COVID-19. Sebahagian besar perbelanjaan adalah untuk program pemberian tunai berjumlah RM25 bilion yang merangkumi 42.4% daripada jumlah perbelanjaan. Di bawah program tersebut, sebanyak RM18.6 bilion dibelanjakan pada 2020 dan Januari 2021 untuk Bantuan Prihatin Nasional (BPN) manakala RM6.4 bilion diagihkan di bawah BPR menerusi beberapa fasa. Program BPR telah memberi manfaat kepada hampir 10.6 juta penerima berpendapatan RM8,000 ke bawah yang mewakili hampir satu pertiga penduduk manakala lebih daripada 8.5 juta penerima berpendapatan RM5,000 ke bawah mendapat manfaat daripada BPR.

<sup>1</sup> Kumpulan Wang ini telah ditubuhkan di bawah Akta Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) 2020 [Akta 830]

**JADUAL 1: Siling Kumpulan Wang COVID-19 dan Prestasi Perbelanjaan Mengikut Program (RM juta)**

	Program	Siling		Perbelanjaan (Sehingga akhir Ogos 2021)
		Pindaan Pertama	Pindaan Kedua	
1	Program subsidi upah, insentif pengekalan pekerjaan dan pengambilan pekerja dan bantuan latihan	18,300	31,000	17,280
2	Bantuan Prihatin Nasional	25,200	41,000	25,008
3	Projek berskala kecil	4,000	6,000	3,692
4	Program kemahiran dan peningkatan kemahiran	2,000	2,000	483
5	Pembiayaan PKS PENJANA	2,000	2,000	-
6	Geran PRIHATIN PKS	2,400	6,000	4,986
7	Pinjaman mikro kredit di bawah Bank Simpanan Nasional dan TEKUN Nasional	1,000	2,000	635
8	Peruntukan bagi perbelanjaan berkaitan COVID-19	5,000	9,000	2,623
9	Dana jaminan makanan	1,000	1,000	486
10	Elaun khas COVID-19 bagi barisan hadapan	600	600	-
11	Dana PENJANA Nasional	600	600	310
12	ePenjana	520	520	650
13	Diskaun bil elektrik	500	500	604
14	Tambahan RM100 bagi Bantuan Sara Hidup (BSH)	300	300	-
15	Bantuan khas untuk pelajar institusi pengajian tinggi	300	300	225
16	Pembiayaan Mudah Bumiputera	200	200	200
17	Subsidi pengangkutan awam MY30	200	200	198
18	Bantuan khas untuk pemandu teksi, pemandu bas sekolah, pemandu bas pelancong, pemandu pelancong, pengayuh beca dan pemandu <i>e-hailing</i>	160	160	152
19	Sokongan bantuan sosial untuk golongan mudah terjejas	110	6,010	994
20	Geran automasi pintar	100	100	71
21	Pinjaman mudah di bawah MyCreative Venture	100	100	30
22	Perlindungan sosial dan latihan bagi pekerja ekonomi <i>gig</i>	75	75	25
23	Kempen e-Dagang bagi PKS dan perusahaan mikro	70	70	30
24	"Shop Malaysia Online" bagi perbelanjaan dalam talian	70	70	56
25	Sokongan penjagaan kesihatan PEKA B40	50	50	50
26	Geran bagi pusat jagaan kanak-kanak dan tadika	50	50	33
27	Dana kandungan digital	35	35	-
28	Bantuan untuk pertubuhan bukan kerajaan	25	25	11
29	Pendigitalan penyampaian perkhidmatan kerajaan	20	20	14
30	Dana pemasaran dan promosi pendigitalan di bawah Agensi Pembangunan Ekonomi Kebudayaan (CENDANA)	10	10	2
31	Pusat Sehenti PKS MyAssist	5	5	5
<b>JUMLAH</b>		<b>65,000</b>	<b>110,000</b>	<b>58,853</b>

Sumber: Kementerian Kewangan Malaysia

Selain itu, program PSU diperkenalkan dalam pakej rangsangan ekonomi PRIHATIN pada Mac 2020 bagi membantu majikan yang terkesan akibat pandemik COVID-19 untuk mengekalkan pekerja dan kelangsungan operasi syarikat. Sebanyak RM17.3 bilion atau 29.4% daripada jumlah perbelanjaan telah diagihkan kepada lebih daripada 350,000 majikan dan sekitar 2.9 juta pekerja. Kerajaan juga telah membelanjakan hampir RM5 bilion bagi GKP sejak pertama kali diperkenalkan di bawah pakej Langkah Tambahan Bagi Pakej Rangsangan Ekonomi Prihatin Rakyat (PRIHATIN PKS+) pada April 2020. Sebanyak 0.9 juta usahawan PKS mikro telah menerima manfaat daripada program ini untuk meringankan beban kewangan dan aliran tunai perniagaan mereka.

Perbelanjaan untuk projek berskala kecil pula berjumlah RM3.7 bilion atau 6.3% daripada jumlah perbelanjaan. Projek yang dikenal pasti di bawah program ini dijangka dapat memanfaatkan masyarakat setempat dan menjana kesan limpahan kepada ekonomi. Projek tersebut termasuk kerja pembaikan infrastruktur asas, kemudahan awam dan jalan serta menaik taraf sekolah daif, perumahan awam dan hospital pengajar yang terlibat dengan COVID-19.

Di bawah program perbelanjaan berkaitan COVID-19, sebanyak RM2.6 bilion telah dibelanjakan untuk perkhidmatan kesihatan berkaitan COVID-19 serta pembelian perkakasan dan peralatan perubatan untuk meningkatkan keupayaan fasiliti kesihatan dan wad ICU. Selain itu, perbelanjaan bagi bantuan sosial untuk menyokong dan menambah baik ekonomi golongan mudah terjejas berjumlah RM1 bilion dengan inisiatif perbelanjaan seperti pemberian secara *one-off* kepada ibu tunggal dan orang kelainan upaya, Program Jaringan Prihatin, Bantuan Makanan Asas dan Program Klinik Bergerak. Baki peruntukan diagihkan untuk program lain seperti ePenjana, Dana Jaminan Makanan dan diskaun bil elektrik.

### Kesimpulan

Krisis pandemik telah menyebabkan Kerajaan meningkatkan sokongan fiskal ke atas ekonomi terutamanya sektor kesihatan. Usaha ini direalisasikan melalui penggubalan Akta Kumpulan Wang COVID-19 yang membenarkan pinjaman tambahan untuk membiayai pakej rangsangan menerusi Kumpulan Wang COVID-19. Pada masa yang sama, ketelusan dan tadbir urus yang baik akan terus didukung melalui pembentangan laporan tahunan bagi terimaan dan perbelanjaan Kumpulan Wang COVID-19 ini di Parlimen seiring dengan amalan terbaik antarabangsa. Melalui pelaksanaan langkah-langkah rangsangan beserta pengurusan Kumpulan Wang COVID-19 yang efektif, Kerajaan yakin objektif untuk memacu negara keluar daripada krisis ini dapat dicapai seterusnya mengekalkan kemampuan fiskal jangka masa sederhana.

### Rujukan

Jabatan Perdana Menteri Malaysia (2021). *Teks Ucapan Pengumuman Khas Pakej Bantuan Perlindungan Ekonomi dan Rakyat Malaysia (PERMAI)*. Dicapai daripada <https://www.pmo.gov.my>

Jabatan Perdana Menteri Malaysia (2021). *Teks Ucapan Program Strategik Memperkasa Rakyat dan Ekonomi (PEMERKASA)*. Dicapai daripada <https://www.pmo.gov.my>

Jabatan Perdana Menteri Malaysia (2021). *Teks Ucapan Program Strategik Memperkasa Rakyat dan Ekonomi Tambahan (PEMERKASA+)*. Dicapai daripada <https://www.pmo.gov.my>

Jabatan Perdana Menteri Malaysia (2021). *Teks Ucapan Pakej Perlindungan Rakyat dan Pemulihan Ekonomi (PEMULIH)*. Dicapai daripada <https://www.pmo.gov.my>

Kementerian Kewangan Malaysia (2021). *Infografik PERMAI*. Dicapai daripada <http://belanjawan2021.treasury.gov.my>

Kementerian Kewangan Malaysia (2021). *Infografik PEMERKASA 2021*. Dicapai daripada <http://belanjawan2021.treasury.gov.my>

Kementerian Kewangan Malaysia (2021). *Infografik PEMERKASA+ 2021*. Dicapai daripada <http://belanjawan2021.treasury.gov.my>

Kementerian Kewangan Malaysia (2021). *Infografik PEMULIH*. Dicapai daripada <http://belanjawan2021.treasury.gov.my>

Kementerian Kewangan Malaysia (2021). *Siri Laporan LAKSANA*. Dicapai daripada <https://www.mof.gov.my>

Malaysia (2020). *Akta Langkah-Langkah Sementara Bagi Pembiayaan Kerajaan (Penyakit Koronavirus 2019 (COVID-19)) 2020 [Akta 830]*.

Malaysia (2020). *Akta Langkah-Langkah Sementara Bagi Pembiayaan Kerajaan (Penyakit Koronavirus 2019 (COVID-19)) (Pindaan) 2020*.

## Tinjauan 2022

Momentum pemulihan dijangka berterusan pada 2022 sejajar dengan kemajuan program vaksinasi yang lancar dan disokong oleh pelaksanaan PPN. Selain itu, RMKe-12 yang baru diumumkan akan menjadi pemangkin untuk merancakkan semula ekonomi, mempromosi pelaburan, melonjakkan pendigitalan dan memperkukuh perkhidmatan awam. Bajet 2022 dirumuskan dengan tiga objektif utama: untuk mengekal dan memacu aktiviti ekonomi, membangun semula ketahanan ekonomi dan menjadi pemangkin agenda reformasi berikutan keperluan untuk memastikan pemulihan kekal kukuh. Oleh itu, Kerajaan akan terus melaksanakan dasar fiskal mengembang untuk membawa negara kembali kepada trajektori potensi pertumbuhan.

Sejumlah RM332.1 bilion (20.3% kepada KDNK) akan diperuntukkan dalam Bajet 2022. Daripada jumlah ini, RM233.5 bilion (70.3%) akan disalurkan kepada OE, RM75.6 bilion (22.8%) untuk DE dan baki RM23 bilion untuk KWC-19. Dari segi peruntukan sektoral, RM133.2 bilion (40.1%) daripada jumlah keseluruhan Bajet 2022 akan diperuntukkan untuk program dan

projek di bawah sektor sosial diikuti oleh sektor ekonomi (20.3%), keselamatan (10.3%) dan pentadbiran am (4.8%). Baki berjumlah RM81.3 bilion (24.5%) akan diperuntukkan untuk perbelanjaan tanggungan dan bayaran pindahan.

Peruntukan **OE** pada 2022 dianggarkan berjumlah RM233.5 bilion atau 14.3% kepada KDNK. Jumlah ini adalah 6.3% lebih tinggi berbanding peruntukan 2021 yang disemak semula iaitu RM219.6 bilion. Emolumen, bayaran khidmat hutang dan bayaran persaraan kekal sebagai tiga penerima tertinggi merangkumi 67.5% daripada jumlah OE atau 9.6% kepada KDNK.

Emolumen penjawat awam merupakan penerima terbesar OE pada 2022. Komponen ini mewakili sekitar satu pertiga daripada jumlah OE dan dianggarkan meningkat kepada RM86.5 bilion. Kenaikan ini sebahagiannya untuk menampung kenaikan gaji tahunan. Bayaran persaraan pula dianggarkan meningkat kepada RM28.1 bilion (12% daripada jumlah OE) berikutan kenaikan pencen tahunan serta peningkatan jumlah pesara dan penerima manfaat yang dianggarkan berjumlah hampir 628,300. Sejumlah 73.7% bayaran persaraan

terdiri daripada pembayaran pencen bulanan untuk pesara dan penerima manfaat manakala sebahagian besar bakinya adalah bayaran ganjaran dan pemberian wang tunai sebagai gantian cuti rehat terkumpul yang tidak digunakan.

Sebanyak RM43.1 bilion akan diperuntukkan untuk bayaran khidmat hutang pada 2022. Daripada jumlah tersebut, 98.2% diperuntukkan untuk pembayaran kupon atas hutang dalam negara sementara bakinya untuk pinjaman luar pesisir. Nisbah bayaran khidmat hutang kepada OE dianggarkan lebih tinggi pada 18.5% sejajar dengan penggunaan instrumen hutang bagi membiayai dasar fiskal mengembang.

Peruntukan bagi bekalan dan perkhidmatan yang mewakili 13% daripada OE, meningkat sebanyak 30.5% kepada RM30.4 bilion. Peningkatan ini disebabkan oleh perbelanjaan lebih tinggi bagi bekalan perubatan serta perkhidmatan profesional. Kementerian yang akan menerima peruntukan tertinggi adalah Kementerian Kesihatan (33.1%), Kementerian Dalam Negeri (12.5%) dan Kementerian Pendidikan (11.2%). Sebahagian besar perbelanjaan bagi menampung perolehan bekalan perubatan serta pembaikan dan penyelenggaraan kemudahan sekolah. Subsidi dan bantuan sosial akan diberikan peruntukan yang lebih tinggi iaitu RM17.4 bilion (2021: RM16.7 bilion) berikutan peningkatan dalam pemberian bantuan sosial. Kerajaan akan terus menambah baik dasar dan mekanisme semasa ke arah bantuan bersasar secara berperingkat dalam memastikan pengagihan yang lebih saksama.

Sejumlah RM14.1 bilion akan diperuntukkan sebagai geran kepada badan berkanun terutamanya bagi perbelanjaan operasi seperti emolument serta bekalan dan perkhidmatan. Geran kepada institusi pengajian tinggi awam terdiri daripada universiti awam dan hospital pengajar merangkumi 64.5% daripada keseluruhan peruntukan. Seterusnya, sejumlah RM7.9 bilion diperuntukkan untuk pemberian dan pindahan kepada kerajaan negeri. Daripada jumlah ini, RM5.9 bilion merupakan pindahan yang diperuntukkan di bawah Perlembagaan Persekutuan.

Memasuki tahun kedua RMKe-12, peruntukan **DE** pada 2022 akan terus diagihkan kepada projek dan program dengan kesan pengganda yang tinggi untuk merancakkan semula pertumbuhan ekonomi, mewujudkan persekitaran pelaburan yang kondusif dan memelihara kesejahteraan rakyat. Oleh itu, sebanyak RM75.6 bilion akan diperuntukkan untuk DE (2021: RM62 bilion). Daripada jumlah itu, RM66.9 bilion diperuntukkan untuk 5,575 projek yang sedang dilaksanakan sementara RM8.7 bilion untuk 1,180 projek baharu. Sektor ekonomi kekal sebagai penerima terbesar iaitu 53.2% daripada DE diikuti oleh sektor sosial (30%), keselamatan (11.9%) dan pentadbiran am (4.9%).

Sejumlah RM40.2 bilion akan disediakan untuk sektor ekonomi bagi meningkatkan keupayaan ekonomi dan memperkukuh daya saing negara. Tumpuan terus diberi kepada projek berkaitan pengangkutan, perdagangan dan industri serta subsektor tenaga dan kemudahan awam. Subsektor pengangkutan akan diperuntukkan sebanyak RM15.5 bilion untuk pembinaan, pembaikan dan penyelenggaraan infrastruktur utama seperti lebuh raya, jalan raya, landasan kereta api, jambatan, pelabuhan dan lapangan terbang. Peruntukan ini termasuk untuk projek sedia ada seperti Landasan Berkembar Elektrik Gemas-Johor Bahru, Sistem Transit Rapid, Lebuhraya Pan Borneo serta menaik taraf Pelabuhan Kuantan, Pahang dan Lapangan Terbang Sandakan, Sabah. Antara projek baharu yang akan dilaksanakan adalah menaik taraf Jalan Marabhai Spur di Tuaran, Sabah, penggantian jambatan di Sik dan Baling, Kedah dan kajian laluan alternatif Jalan Seremban-Kuala Pilah, Negeri Sembilan.

Penerima lain di bawah sektor ekonomi adalah subsektor perdagangan dan industri dengan peruntukan RM2.1 bilion. Antara program di bawah subsektor ini adalah untuk memperkukuhkan kemampuan keusahawanan termasuk PMKS selaras dengan Dasar Keusahawanan Nasional 2030. Di samping itu, tumpuan akan diberi untuk menyokong pertumbuhan industri dengan menyediakan geran atau pinjaman untuk aktiviti termasuk penyelidikan dan pembangunan serta pengkomersialan produk. Program terlibat

termasuk Program Pembiayaan Usahawan PUNB, Dana untuk Pelaburan Strategik Tempatan, Dana untuk Projek Berimpak Tinggi, Pinjaman Penyelidikan dan Pembangunan untuk Aeroangkasa dan Bidang Elektrik dan Elektronik, Skim Pembiayaan Perniagaan Khas untuk Wanita (DanaNITA) dan Industri4WRD.

Sejumlah RM3.2 bilion akan diperuntukkan kepada subsektor tenaga dan kemudahan awam untuk memberi akses yang lebih meluas kepada rakyat terutamanya bekalan elektrik dan air, akses telekomunikasi dan perkhidmatan pembentungan. Subsektor pertanian pula akan diberi peruntukan sebanyak RM2.9 bilion terutamanya untuk program pembangunan peneroka dan pekebun kecil, penanaman semula kelapa sawit dan getah, sistem pengairan padi serta peternakan ayam, itik dan lembu yang dijangka dapat meningkatkan industri agro. Di samping itu, subsektor alam sekitar akan diberikan sejumlah RM2.1 bilion terutamanya untuk projek pemulihan sungai dan mitigasi banjir seperti pembinaan lembangan sungai bersepadu, penyelenggaraan kolam takungan banjir, menaik taraf empangan dan penstabilan tebing sungai.

Sektor sosial merupakan penerima DE kedua terbesar akan diperuntukkan dengan RM22.7 bilion. Peruntukan ini meningkat sebanyak 30.7% berbanding RM17.3 bilion yang disediakan pada 2021. Subsektor pendidikan dan latihan kekal sebagai penerima peruntukan terbesar di bawah sektor ini berjumlah RM12 bilion, terutamanya untuk TVET, geran penyelidikan dan pembinaan serta peluasan institusi pendidikan. Subsektor kesihatan akan diperuntukkan RM4.5 bilion untuk memastikan ketersediaan dan akses sistem kesihatan yang komprehensif. Selain itu, peruntukan juga akan digunakan untuk pembelian kenderaan dan peralatan perkhidmatan perubatan. Antara projek baharu ialah pembinaan Hospital Kapar, Selangor dan menaik taraf kemudahan hemodialisis hospital Kementerian Kesihatan Malaysia di Kedah, Pulau Pinang dan Perak, serta bilik autopsi Jabatan Forensik Hospital Sultan Ismail, Johor.

Kerajaan terus komited untuk menyediakan rumah mampu milik yang mencukupi dan berkualiti kepada golongan berpendapatan rendah dan sederhana. Oleh itu, RM1.8 bilion akan diperuntukkan di bawah subsektor perumahan dengan sebahagian besarnya disalurkan kepada pembinaan rumah PPR dan menaik taraf kuarters penjawat awam. Projek lain di bawah subsektor ini termasuk program Rumah Mesra Rakyat dan pembangunan komuniti sifar sisa dalam kalangan PPR terpilih seperti di Sri Kemuning di Temerloh, Pahang dan Seri Sena di Kangar, Perlis.

Sektor keselamatan akan diperuntukkan RM9 bilion untuk disalurkan kepada subsektor pertahanan (60.4%) dan keselamatan dalam negeri (39.6%). Peruntukan ini melibatkan penambahbaikan sistem dan perkhidmatan rangkaian serta naik taraf aset ketenteraan dan peralatan keselamatan. Selain itu, peruntukan akan disediakan untuk projek infrastruktur seperti kuarters anggota keselamatan, kemudahan kesihatan dan menaik taraf penjara.

Sejumlah RM3.8 bilion akan diperuntukkan untuk sektor pentadbiran awam bagi memperkukuh sektor awam di bawah RMKe-12. Beberapa projek utama termasuk meningkatkan pendigitalan dalam sektor awam seperti 1GOVNET, MYGOVUC, Sistem Rekod Transkripsi Mahkamah atau e-Kehakiman serta memperluas perkhidmatan pusat data sektor awam. Di samping itu, peruntukan turut disediakan untuk penyelenggaraan bangunan, aset dan kemudahan kerajaan seperti kuarters, mahkamah dan institusi latihan.

## Pinjaman Boleh Dituntut Persekutuan

Jumlah Pinjaman Boleh Dituntut Persekutuan<sup>1</sup> sehingga 31 Disember 2020 ialah RM43.1 bilion atau 2.6% kepada KDNK. Daripada jumlah pinjaman yang dikeluarkan melalui Kumpulan Wang Pembangunan, lebih daripada separuh adalah pinjaman kepada syarikat berjumlah

<sup>1</sup> Pinjaman Boleh Dituntut Persekutuan merupakan sebahagian daripada aset kewangan Kerajaan Persekutuan yang terdiri daripada kemudahan pinjaman kepada kerajaan negeri, kerajaan tempatan, badan berkanun, syarikat, koperasi dan pelbagai organisasi.

RM24.9 bilion, diikuti kerajaan negeri sebanyak RM13 bilion (30.1%) dan badan berkanun sebanyak RM4.9 bilion (11.4%). Selain itu, pinjaman turut diberikan kepada kerajaan tempatan berjumlah RM143 juta (0.3%), organisasi lain sebanyak RM200 juta (0.5%) dan koperasi sebanyak RM6.8 juta (0.02%).

Pengeluaran pinjaman melalui DE pada 2021 dianggarkan berjumlah RM1.2 bilion atau 1.9% daripada jumlah keseluruhan DE. Daripada jumlah tersebut, kerajaan negeri dan syarikat kekal sebagai penerima terbesar merangkumi 91.2% daripada jumlah pinjaman yang dikeluarkan diikuti oleh badan berkanun (7.8%) dan lain-lain (1%). Pinjaman tersebut diberikan bagi memudahkan pelaksanaan projek pelaburan jangka masa panjang seperti infrastruktur jalan raya, bekalan air dan pembedungan.

Kerajaan dianggarkan menerima pembayaran balik pinjaman berjumlah RM0.8 bilion pada 2021. Sekitar 41% daripada jumlah pembayaran dijangka diterima daripada kerajaan negeri dengan Sabah dan Sarawak terus menjadi penyumbang utama. Pembayaran balik daripada syarikat pula diunjurkan sekitar RM0.4 bilion. Bank Pertanian Malaysia Berhad (Agrobank), Pengurusan Aset Air Berhad dan Yayasan Tekun Nasional merupakan tiga penyumbang teratas dengan jumlah pembayaran berjumlah RM285.5 juta. Selain itu, jumlah pembayaran balik daripada badan berkanun dianggarkan berjumlah RM59.2 juta dan kerajaan tempatan sebanyak RM5.1 juta. Pembayaran daripada organisasi lain seperti kelab dan persatuan pula dianggarkan berjumlah RM35.8 juta.

Kerajaan Persekutuan dianggar menyediakan pinjaman berjumlah hampir RM2 bilion melalui DE kepada kerajaan negeri, syarikat, badan berkanun dan organisasi lain pada 2022. Kerajaan negeri menjadi penerima pinjaman tertinggi sebanyak RM1 bilion diikuti oleh syarikat (RM0.8 bilion), badan berkanun (RM123 juta) dan organisasi lain


(RM10.9 juta). Pinjaman kepada syarikat akan digunakan terutamanya untuk membiayai program dan projek berkaitan bekalan air dan elektrik, pemulihan tanah untuk estet getah, penanaman semula kelapa sawit dan pembinaan lebuh raya. Pinjaman kepada kerajaan negeri, kerajaan tempatan dan badan berkanun pula akan digunakan terutamanya untuk menaik taraf dan menyelenggara infrastruktur bekalan air dan pembedungan, pembinaan empangan dan membiayai projek pembangunan tanaman.

Bayaran balik pinjaman pada 2022 dianggarkan berjumlah RM0.6 bilion. Hampir separuh daripada jumlah pembayaran balik dijangka diterima daripada kerajaan negeri dengan Sabah, Sarawak dan Selangor sebagai penyumbang terbesar. Pembayaran balik pinjaman daripada syarikat dijangka bernilai RM0.2 bilion manakala baki adalah daripada badan berkanun (RM58.6 juta), kerajaan tempatan (RM4.2 juta) dan organisasi lain (RM11.7 juta).


## Kesimpulan

Kerajaan akan terus memainkan peranan dalam mengurangkan impak pandemik COVID-19 kepada rakyat, perniagaan dan ekonomi. Keutamaan segera Kerajaan adalah menyediakan sokongan sewajarnya bagi pelaksanaan PPN, mempercepat pertumbuhan ekonomi dan membawa negara keluar daripada krisis ekonomi dan kesihatan. Sebarang penjajaran semula suntikan fiskal akan bergantung kepada tahap pemulihan untuk memastikan ekonomi kembali kepada trajektori pertumbuhan. Walau bagaimanapun, inisiatif untuk meningkatkan perbelanjaan yang efektif dan efisien akan diteruskan. Pada masa yang sama, Kerajaan kekal komited untuk mendukung ketelusan dan akauntabiliti dalam pengurusan kewangan awam seperti yang dizahirkan dalam penerbitan Kenyataan Pra-Bajet pertama dan Kertas Konsultasi Awam.


**RAJAH 3.1.** Jumlah Perbelanjaan Mengikut Sektor




**RAJAH 3.2.** Jumlah Perbelanjaan Mengikut Kementerian dan Agensi




**RAJAH 3.3.** Perbelanjaan Mengurus Mengikut Komponen




**RAJAH 3.4.** Perbelanjaan Mengurus Mengikut Sektor



**RAJAH 3.5.** Perbelanjaan Pembangunan Mengikut Sektor



**RAJAH 3.6.** Pinjaman Boleh Dituntut Persekutuan di bawah Kumpulan Wang Pembangunan Mengikut Penghutang, Akhir 2020



<sup>1</sup>Anggaran disemak  
<sup>2</sup>Anggaran belanjawan tidak termasuk langkah Bajet 2022  
 Sumber: Kementerian Kewangan Malaysia